

Regnard

Sire, je truis ou Methodore,
Qui fist mainte bonne memore,
Qui de Licie evesque fu,
Bon preudhom et de grant vertu:
Adam, ce dist, vesqui long tams
Et passa oultre neuf cens ans,
Sa vie moult lui desplaisoit
Et moult de vivre se doloit,
Anuy au coeur lui couru seure
Et se lamentoit à toute heure,
Plouroit disant: 'Las! que feray,
Ma grant perte où recouperay?
Povre ame, quel conseil prendras,
Et povre corps, que devenras?'
Il moult dure vie menoit
Et labourer le convenoit,
A grant ahan, à grant langour
Prenoit sa vie nuyt et jour
N'onques puis n'ot joye au cors
Qu'i[l] fust de paradis mis hors
N'onques puis ne rit ne n'ot joye,
Simple vie mena et eoye.
Pour ce son filz Seth appella
Et son secret lui revela:
'Beau filz Seth, pour moy t'en iras
Par un chemin que trouveras,
Qui en paradis te menra,
Et jusques là ne te faulra.
Par ce chemin fu je jetté
Quant de Dieu perdy l'amistié;
Au chemin pas tu ne fauldras,
Encor mes pas y trouveras,
Que onques puis herbe n'y vint
Pour le grant pechié qui m'avint;
Là trouveras mainte merveilles,
Nul ne porroit penser pareilles,
Là trouveras tu, beau filz Seth,